

寶雞縣志

卷一

卷二

卷三

卷四

舊敘

知縣朱炳然

夫志邑史也史掇眞不採華崇正不釣詭備事不駁而濫所以昭實錄垂法戒非必嫻於文稱班固云陳倉面波千頃目秀萬峯汧吳襟帶其右岐鳳雄峙其左昔傳炎帝周姜誕於此則靈傑可識矣不佞總角仰止及入境雞渭磻溪猶故也而往哲久湮英碩淪沉爲之太息於是詢故室訪野叟若而孝若而節若忠義闡幽揚芳悉產別區延邑學弟子員編次清署大都不增美不文瑕質而該直而不阿又得弘正間殘編摸其概拔其尤而志始成焉噫嘻志非徒載記不沒沒也厯封域則思固慎析物產則思樽嗇按登眺則吊古興懷慝有抑淑有彰則思律檢而貞持然則志之刻獨

文也乎哉蓋凜凜冰鑒與國史永傳不少矣余敢望孟堅萬一乃
素所景仰而鑒之者常在斯乎遂梓以廣同志時萬厯戊申歲仲
春廿一日知寶雞縣事大足太彬朱炳然謹識

舊敘

知縣嚴夢鸞

余丁丑仲冬承乏寶雞是日周步城頭觀茲邑形勢北屏山原南扼棧雲清渭連金陵玉澗山水相環如帶美哉山川雄勝結秀鍾英自古神農氏所以興也余慨慕久之因求茲邑之封域城池戶口田賦古蹟風俗文獻節孝宦績人物兵防祀典之書而觀之咸曰縣志舊板久爲兵火焚燬故家獻老或有舊冊存焉余輾然思曰郡邑之志卽古列國之史一國之事皆載其中不載其何以傳但余自視事伊始卽值兵荒頻仍余飲冰焚香誓天以保障爲己任乃爲之繕器械嚴防禦捐貲築鑿疏棧建堡剔蠹息訟振旅和民援剿出沒無常之寇調停八百偏苦之站日無暇晷曷克及此

寶鼎志
然而斯志固未嘗一刻擲懷也今歲秋抄案牘頗暇乃進諸生披閱舊冊並所未載續次成編舉所爲封域城池戶口田賦古蹟風俗文獻節孝宦績人物兵防祀典及諸僊釋寺觀各外志悉皆離離指掌焉爰書諸梓以垂永世非敢曰纂修縣史抑傳諸將來俾有所徵攷云
崇禎十三年歲次庚辰孟冬穀旦知寶雞縣事平灤嚴夢鸞翔紫甫謹識

舊敘

党崇雅

志也者覈事顯義用昭勸戒蓋亦書敘九丘詩陳列國意也余邑志自大足朱公重修後迄今殘篇幾不可攷我邑 父母嚴公一

旦搜覓其舊簡諸士而次第之然亦未及他有裒益止此賦額雉堞迴異疇昔云爾余謬謂形勢山川之所結土產山川之所宜人物山川之所鍾非人之所可爲也舊載旣悉何必他有裒益其待培養使之不澆且耗者莫大風俗物力稽古神農氏感神龍而育於余邑姜水其俗樸重端慤不爭忿而財足交易而退各得其所今何如哉語云窮則變今日之風俗猶望今日之人心留之乎惟自歲之己巳寇氛漸熾戶口日消桑田半成草萊三餉有加鹽課

有加房稅有加 藩封之贍田有加捍禦之兵餉有加且也輪蹄
如織聯鳳接漢偏苦未有寧息嗟嗟彈丸兵荒頻仍之衝邑司牧
者撫字極勞終何補於仰屋之嗟所可爲者慎固封守樹內藩以
禦外侮而已余故出蜀入 告曰綢繆西南牖戶雖兩塵 聖慮
深愧空言無當今因嚴公毅然圖之桑土始徹崇墉圪圪克竟厥
成不然陳寶抱蜀漢之喉少示之敗恐憂不在一邑矣此嚴公區
畫賦額雉堞之微意也余思 國步多艱誰爲中流擊楫倒黃池
之戈勒燕山之石俾薄海內得扶杖而聽寬租之 詔安居食力
再見法省不煩之治心嚴公之心者冀旦暮遇之耳崇禎庚辰孟
冬于姜党崇雅謹識

舊敘

知事薛光前

稽鄭漁仲曰志之大源起於爾雅馬遷曰史班固曰書曄嶠曰典
張勃曰錄第其中或浮於泛議或略於事實率無當於爾雅志之
難言久矣不佞丙戌夏奉命治陳寶時地方新經蹂躪士民遑遑
日拊循安輯不暇敢言文事越丁亥諸緩急稍就理始集諸雋士
於學宮而課其文戊子之夏簿書公餘尋所爲邑之圖說封域而
不可得尋所爲形勝古蹟陵墓風俗而不可得攷所爲城池戶口
田賦徭役水利方物而茫然攷所爲祀典兵防官職名宦選舉孝
義節烈恩蔭藝文而茫然詢其故僉曰先戊申大足朱公志之庚
辰平灤嚴公重刻之皆以兵火故不存噫彰往鏡來典何如鉅而

忍令闕歟遂敦請邑紳士於金臺而作始續館穀於牛山而集成
罄所觀記再加編輯爲卷二十歷時六月始告竣不佞受而卒業
上下數千百年洞若觀火矣遂序曰提封百里閭澤欲流山谷隔
閼幽隱豈周乃著圖說千室之聚延袤百里跨秦西南相爲唇齒
乃志封域雞山巖嶠渭水滌紆如螺如帶現秀逞奇乃志形勝徘徊
適魯揮涕浮湘流風興感懷古不忘乃志古蹟寒山秋草夜室
常扃佳氣蔚蔚想像儀型乃志陵墓先進非野純儉吾從破觚斲
珣返於洪濛乃志風俗王公設險保障居先相彼名邑隱然重關
乃志城池百年積累編齒滋蕃國脈攸繫生道孔艱乃志戶口則
壤有制徑竇紛紜辨方履畝版籍載清乃志田賦征調頻仍心歌

往役節以制度期於休息乃志徭役山蹊燥壤引灌莫施陂堰瀦
溜旱魃攸資乃志水利阻山嶢嶠不產珍奇菽粟絲枲徧土是宜
乃志方物周旋禮讓陟降禮陰有其舉之期格精禮乃志祀典烽
警密邇無事張皇慎固封守以備非常乃志兵防分職別事各有
司存敢告在位作士勤民乃志官師流風善政須藉良吏月試已
成譽其有試乃志名宦山朗水秀棧樸菁莪經明行修應運網羅
乃志選舉百行之源萬事之紀發潛闡幽高樹懿矩乃志孝義柏
舟絕詠黃鵠興歌冰霜凜凜力挽頽波乃志節烈分猷展采爰賴
臣寮報隆所自華袞所褒乃志恩廕含虞孕采摘藻敷瓊陳詩觀
風考古鏡今乃志藝文凡此皆諸紳士苦意編摩焜耀傳世之業

也不佞更有申焉夫政莫大於經時教莫重於宏化事莫準於稽古法莫良於宜民將安所取衷哉孟子曰反經而已明道術正人心俾官師因之表率寮屬父兄因之訓迪子弟斂華就實去僞歸眞人心正而學術明教化興而風俗美是司牧者責也所藉以風之者斯志之功大矣
順治六年知寶雞縣事晉萬泉薛光前謹識

舊敘

知縣周愐

陳寶之志由來久矣兵火散逸僅類殘碑斷碣耳余承乏茲土疲瘁馬鬣戴星出入未遑編輯會學臺暨郡尊兩大人檄下促旦夕以觀厥成余適秩滿遷去因求之縉紳先生家得其遺牒鱗集成篇用壽梨棗越月而刻始成但裒益未加或者病其踵事而未增華也余謂山川雲物往哲今賢流耀競奇無容膾炙卽徭站騷煩哀鴻重足得之聽觀者目色而神傷安俟余之悲鳴聒聒爲雖然石火電光一線僅存耳倘後之君子履其地讀其書修明補救不嘆杞宋之無徵余願足矣又何求焉
崇禎十四年歲次丁酉孟冬穀旦知寶雞縣事三韓周愐謹識

舊敘

知縣何錫爵

國家建官設牧畀以民社四境之內實統屬之其間封域之廣狹山川之險易風土之淳澆名物食貨之豐嗇一有不知當事者之恥也 朝廷有史郡邑有志志之爲書網羅古今統括萬有銘諸板而藏之示有守也余治陳寶之初風土人物邈不相習名蹟物產更覺惘然問志于司藏告余曰邑中舊志代有翻刻自兵燹以來地方蹂躪人戶流亡志之舊板缺略不可考矣余思縣令爲

天子職守是土則凡山川土地 天子之疆界賦式額徵 天子

之財用物產蓄殖 天子之食貨英雋碩耆 天子之人才若夫

星紀分野上關天文勝蹟名都下徵地理文事武備洵政治之規

模忠孝節烈實教化之綱維志之不存亦安所稽乎乃訪諸故老
購求遺書既得之卽欲刊布奈 朝廷方有事西南轉輸紛紜日
無暇晷此事未及謀焉今年冬長鯨授首民以一寧而邑之百務
漸次卽安余始壽諸梨棗以永厥世是役也縣尉熊君董工郡學
吳子校正余之賴兩君子以相與有成者匪敢曰有功修明也聊
以無忝職守云爾
康熙歲次辛酉臘月望後六日寶雞縣令三
韓何錫爵晉侯氏謹識

舊敘

知縣許起鳳

苑川爲關中西南門戶四達衝衢百產雲集而周原隴隴地沃民稠聲名文物之盛甲於他邑蓋鳳屬一大都會也恭逢我朝重熙累洽休養生息百餘年天地効靈人民和樂山川日出其利風俗日進於淳人文秀美接踵而起官斯土者正宜潤色昇平鼓吹大雅豈仍昔日之因陋就簡爲哉予以壬午仲夏奉命調宰斯邦下車之日採風問俗披閱邑志見其篇帙無多舉一漏百年深剝落字跡僅存且按籍而稽大都名則是而實則非計其書距今已八十餘年矣前聞往見事如積薪繼此不修又將何以信今而傳後耶第因事有緩急先其大者越明年而棧道重修以利行旅

城工告竣以固封疆以及館驛衙署次第整飭皆已就緒幸際時和年豐訟廷清簡遂於甲申初夏謀諸寅僚僉有同心請之上憲皆蒙允可乃遴邑中紳彥十餘人設局授餐分類纂修拾遺補闕編爲十卷閱半載而書成較之舊牒新增三分之二釐綱剔目開卷一新翻閱之下可以識是邦山川之景勝驗物產之豐饒採風俗之醇懿覘人文之美備皆駸駸乎十倍於昔偉哉一闢右名區視向之因陋就簡者不居然一博大昌明之氣象耶至於稽度考憲維風勵俗教養有方張弛得體以仰副 聖天子慎選牧令之司無忝父母斯民之責則予願與後之君子朝夕共勗焉耳是爲序時乾隆二十九年甲申全月寶雞縣知縣唐昌許起鳳謹識